



Ina grupp musicants sursilvans durant l'aperitiv.

FOTOS G. N. STIGIER

«Vus essas ils eroxs dal mintgadi»

Dieta dals veterans da musica dal Grischun

DA GION NUTEGN STIGIER / ANR

■ **En il center da la dieta è stà l'in-scuenter da veterans e veteranas cun discussiuns empernavilas. Ultra da quai èn 15 veterans vegnids undrads per lur commembranza da 50 e 60 onns tar ina societad da musica. La dieta 2019 ha lieu a Lai.** Musicantas e musicants da la Societad da musica Breil/Dardin ed auters numerus voluntaris han purschi tetg als 430 veterans, veteranas e giasts. Suenter la dieta è mintgin turnà a chasa cun bunas impressiuns cun esser stads quels da Breil e Dardin fitg buns ospitants. Tuts han testifitgà ch'en quels dus lieus vivan tuts per la cultura locala, ella ch'è ina pitga impurtanta dal mintgadi a Breil ed a Dardin. *Josef Schaniel*, il president da l'Uniuin dals veterans da musica dal Grischun, ha ditg che suenter il 1986 saja Breil per la segunda giada lieu da la dieta. La preschientscha dad uschè blers veterans e veteranas confermia che la dieta saja fitg stimada. In onn senza quel di, nua ch'ils contacts tranter musicants e musicantas vegnan cultivads uschè fitg, saja bain nunimaginabel, ha menziunà il president da l'uniun cun 1300 commembers e commembras. Zunt plaschair fettschia che *Tina Gartmann*, la presidenta dal cussegl grond, haja er chattà la via a Breil per assister a la 43avla dieta, ha ditg Schaniel.

Laud per ils parsuras

Ilis affars statutarics, quels èn tar la dieta bunamain secundars, dentant tutina obligatorics. Schaniel ha en curts pleds laschà repassar il davos onn, in onn pli quiet. El ha cunzunt ludà la buna lavur dals parsuras locals dals veterans e da las veteranas, els che sajan da gronda valur per l'uniun. *Gaudenz Lütscher*, il cassier da l'uniun, ha preschentà il quint annual che serra tar entradas e sortidas da 13310 francs cun in gudogn da 557 francs. Ilis preschents han decidì da laschar la contribuziun annuala vinavant sin diesch francs. Decidì è er vegnì ch'en il futur hajan commembers d'onur da l'uniun na pli da pajar la contribuziun annuala. En tut èn quai diesch persunas.

Musicants fidaivels

In act festiv è lura adina l'undrientscha dals novs veterans d'onur da l'uniun e dals «CISM» veterans. A Breil èn gist otg umens vegnids undrads per lur commembranza da 60 onns tar ina societad da musica. Da nov dastgan els ussa sa numnar «CISM» veterans e pon uschia guardar enavos sin ina gronda activitad sco musicants. Set umens èn vegnids undrads sco veterans d'onur cun esser 50 onns musicants activs. Sa regardads èn ils veterans e las veteranas er da lur 21 collegas da musica ch'han en il decurs dal davos onn bandunà quest mund.

Musica fa plaschair

A pled è er vegnì *Clau Schlosser*, il president communal da Breil/Brigels. Ina uniun, quella viva mo grazia a la vitalitad ed a l'activitad da mintga commember e commembra ubain er musicant e musicanta. En quella chaussa sajan veterans e veteranas da musica in bun exempel, ha punctuà Schlosser. Tina Gartmann, la presidenta dal cussegl grond, ha ditg: «Musica fa plaschair». Ella ha er ditg ch'en Svizra hajan bunamain mintga citad ed er mintga lieu ina musica, quai che saja fitg plaschaivel. Insumma saja la musica per tuts da grond'impurtanza e d'immensa valur. Ella colliia, promova la vita sociala, la promoziun dals giuvens, la cultura ed er l'amicizia, ha menziunà Gartmann.

Tut auter che vegls

Andy Kollegger, il president da l'Uniuin chantunala da musica dal Grischun e commember da la direcziun da la Federaziun federala, ha cunzunt ludà l'activitad da veterans e veteranas da musica. Umens e dunnas, tuts meritan grond respect. Kollegger ha lura er ditg che veterans e veteranas sajan tut auter che vegls. Il num veteran, quel saja plitost per in um ch'haja terminà ses servetsch militar, en mintga cas na per in musicant e per ina musicanta. El haja il dretg num per mintgin e mintgina: «Erox dal mintgadi», ha accentuà Kollegger.



Stada a la dieta è er Tina Gartmann, la presidenta dal cussegl grond.



Da buna luna ils veterans da S-chanf.



Organisà bain la dieta cun ses blers voluntaris: Ivo Volken, il president da la Societad da musica Breil/Dardin.



Viva ils veterans da musica: Vitos Berther, Ciril Bass, Ervin Tuor, Aldo Deplazes e Marcus Candinas (da san.).



Il president communal da Breil/Brigels cun dus musicants: Pius Tuor, Clau Schlosser e Teodosi Muoth (da san.).



La musica ospitanta ha er dà a la dieta il dretg rom musical.